

Jé sis magnifique, mèrci par ALP

Jé sis magnifique, mèrci,
l'n'y'a rein d'ma auv' ma santé!
J'ai des rhonmatisses dans mes g'nours,
Et la goutte dans man gros orté,
Man pouls est faibl'ye, et j'n'ai pas des dents,
Mais j'sis hardi bein, considéthant!

J'ai des cors sus les deux pids,
Et lé ma m'tracache tout l'temps.
Ch'est rare qué j'dors lé long des nyits,
Et j'm'êmôque au solé l'vant.
Ma mémouaithe n'est pas ch'qu'ou 'tait d'vant,
Mais jé n'sis pas mal, considéthant!

l'n'faut pas admettre qu'nou-s-est afflyigis,
Coumme nou d'veint tous quand nou vieillit,
Faut, s'dréchant, dithe: "J'n'sis pas finnie,
Man doue! J'sis magnifique, mèrci!"

Comment qué j'sai qu'man janne temps est passé?
Ch'est qué l'entraïn né m'entraîne pas coumme i' soulait!
Mai v'là tchi n'fait d'rein et j'pense en souôriant
Ès pliaiches où'est m'n entraïn ma m'né d'temps en temps!
Qué la vieillèche est dorée, est un **diton** qu'nou ouait,
Mai j'en ai mes doutanches quand j'grîmpe dans man liet!
Mén ouïe dans l'titheux, mes dents dans l'dgichon,
M'n yi sus la tabl'ye au pid du carillon!
Et d'vant m'endormi j'mé d'mande tchiquefais,
Y'a't'i' aut' chose qué j'ai oublié à mettre sus l'ais?

Quand j'tais janne auv' mes rouoges souliers,
J'mé toupinnais su l'but d'mes ortés.
Quand j'd'vins pus vielle, j'dansais toute la niet
Auv' des souliers en bieu bliu sâtin!
Mais à ch'teu ch'est des nièrs chaussons en v'lous pour mé,
Comme j'gabathe auv' man baton du matin au sé!
Dé bouonne heuthe lé matin après eune tâssée d'thée
J'ramâsse la gazette et j'lié les décès;
Lé mein n'y'est pas, d'même j'dis "Dgieu merci"
Et j'mange deux beurrées d'g'lée
Et pis j'vais m'ercouochi!

